

وجوده کتیرمش اولان جاعتلر دشمنك طویله، تفکیله قولای قولای دوریلزلر. «قلعه، ایچندن فتح اولنور.» سوزی نه بویوک برحقیتدر! مسلمانلر ایچون بوحقیقتدن غافل اوله جق زمان دکدر. خارجه کی دشمنی براقوبده داخلده بربرلرله اوغراشاسینلر. موجودیتلرینه برر برر خاتمه چکبلن حکومت اسلامیه نك حالندن واسون عبرت آلسینلرکه انقراضلرینه سبب هپ آرملرنده کی تفرقه ایدی، باشقه برشی دکل ایدی.

آیت جلیله ده کی صبر هردلو شدائده کوکس کرمک؛ هیچ بردشمن، هیچ برتهلکه قارشیسنده متاتی الدن براقامق مغالینه در؛ یوقسه مسکین مسکین اوطورمق، مذله، محکومیه قاتلانوب طورمق دیمک دکدر. توکل کی صبرده بعضیلری طرفندن یا کلیش تلقی ایدلمکده اولدینی ایچون شو اخطاره لزوم کوردک. ربنا افرغ عاینا صبراً وثبت اقدامنا...

محمد عاکف

فَقْرٌ وَفَتْاؤُیْ

فقر و عبادات اسلامیه تاریخچه :

حج

۱۰

قوشلق زمانلری ایدی، رسول اکرم افندمن حضرتلری طوغری حرم شریفه کله رک باب بی شیه دن مسجد الحرامه داخل اولدیلر. کعبه معظمه بی مشاهده ایدنجه: «اللهم زد بیتک هذا تشریفاً وتعظیماً وتکریماً ومهابة» ديه دعا ایلدیلر. بعض روایتلره کوره نظر نبویلری بیت شریفه واقع اولونجه مبارک اللرنی قالدیره رق تکبیر کتیردکن صوکر: «اللهم انت السلام ومنک السلام حینا ربنا بالسلام اللهم زد هذا البيت تشریفاً وتعظیماً وتکریماً ومهابة» وزد من حجه واعتمره تکریماً وتشریفاً وتعظیماً وبراً» دیدیکی منقولدر. بعده کعبه معظمه یه طوغری یورودیلر. حجر اسود حذاسنه کلنجه اللرنی قالدیرمه رق آتی سلاملادیلر. بوراده تحیه المجد نمازی قیلدینی، طوافه ال قالدیره رق تکبیر ایله باشلادینی موثوق دکدر. صوکر کعبه مکرمه بی صوانه آله رق طوافه بدأ ایتدیلر. فقط طواف ایدرکن کعبه نك قاپوسی اوکنده، آرقه سنده، اولوق آنتده معین برزکر ایله دعا ایتمش اولدقلری مرتبه ثبوت واصل اولما مشدر.. یالکز رکن یمان ایله حجر اسود آراسنده «ربنا آتنا فی الدنیا حسنة» وفی الآخرة حسنة وقنا عذاب النار» دیدکلری روایت اولمشدر. طوافه باشلامدن اول اضطباع ایتمش، یعنی ردای شریفنک

براونی صاغ قولتوغنی آلتدن آله رق صول اوموزی اوزرینه آتمش ایدی. اوکی اوچ شوطی رمل ایله، یعنی سرعتلی و جالمی آدیلر ایله مبارک اوموزلرنی سیکه رک اجرا بویوردیلر.

قالان دورت شوطنده ایسه رمل ایدیلدی. طوافک بعض شوطنده حجر اسودک حذاسنه کلنجه اللرنده اولان چوکان ایله اشارت ایدرک آنک اوچنی، بعضلرنده اللرنی تماس ایتدیره رک آنلری، بعضاً بلا واسطه حجرک کنديسنی تقیل بویورلدی. رکن یمان یی استسلام بویوردقلری مروی ایسه ده، بو خصوصده هیچ بروجهله تقیل ثابت دکدر.

عليه الصلاة والسلام افندمن حضرتلری، اوزمانلر بیت شریفک یاقینلرنده بولنان «مقام ابراهیم» ک آرقه طرفلرینه کله رک: «واتخذوا من مقام ابراهیم مصلى» آیت کریمه سنی تلاوت بویوردقن صوکر ابرنجیده فاتحه شریفه «قل یا ایها الکافرون» دیگر اخلاص سوره لرینی ضم ایدرک ایکی رکعت طواف نمازی قیلدیلر. بعده حجر اسودی سلاملایه رق، حرم شریفک صفایه آچیلان قاپوسندن خارجه چیقدی، صفایه کلدیلر: «ان الصفا والمروة من شعائر الله» آیت کریمه سنی تلاوت ایتدکن صوکر «ابدؤا بما بدأ الله» ديه رک تپه یه صعود بویوردیلر. آرتق کورنمکده اولان بیت شریفه توجه ایله تکبیر کتیره رک: «لا اله الا الله وحده لا شریک له له الملك وله الحمد وهو على کل شیء قدير لا اله الا الله وحده انجز وعده ونصر عبده وهزم الاحزاب وحده» ديه اللهی توحید ایتدکن صوکر: اللهم اناسألك موجبات رحمتک وعزائم حضرتک والضيمة من کل بر والسلامة من کل اثم لاتدع لی ذنباً الاغفرته ولاهماً الا فرجته ولا کرباً الا کشفته ولا حاجة الا قضيتها...» ديه رک تضرع و نیاز ایلدیلر. تکرار اوچ کره تهلیل متعاقب دعا ایتدکن صوکر تپه دن اینه رک مرویه طوغری یورومکه باشلادیلر. صوکرالری میلین احضرین ایله تحید ایدیلش اولان وادیدن هروله ایله، یعنی سعی وسرعت ایله کچمک مرویه کلدیلر. بوراده تپه یه چیقارقی صفاده اولدینی کی دعا ایتدیلر. سعيک برنجی شوطی بویله جه تمام اولدی. مروه دن صفایه کله رک ایکنجی شوطی ده علاوه ایتدیلر. صفادن تکرار مرویه... روایت اولندیغنه کوره انسای سعیده: (رب اغفر وارحم انک انت الاعز الاکرم) ديه رک دعا ایدیورلدی. فقط چوق کچمدن اورالره اهالی تولدی. هرکس اول حضرتک یانینه صوقولمقله، مبارک یوزلرنی کورمک ایستیوردی. او یله اولدی، که آرتق یایان اوله رق سعی قابل دیکلدی. بونک اوزرینه دوه یه بیدیلر. یدی شوط اولق اوزره سعی مروده ا کمال بویوردیلر.

بعده عليه الصلاة والسلام افندمن حضرتلری هدیلری بولنمان اصحاب کرامک حلف و یاخود تقصیر ایله احرامدن چیقملری لزومی اعلان ایتدیلر. بوحاله کوره هدیلری بولنانلر احراملرنده دوام، بناءً علیه قارن یاخود مفرد اوله جقلردی. هدیلری بولنمانلر احرامدن